



出國旅行

又會到暑假放假個時節也，想愛利用這段時間帶全家人出國去寮，這下就做得上網尋過有信用個旅行社，揀擇過有興趣個國家、路線，安排一擺快樂個旅行。

雖然暑假去寮個價數過高，一哪仔又幫滿個人，機票、飯店仔無麼好定，旅行個品質可能無恁好。因為細人仔這段時間正有長假，盡多爺哀就盡盼得定落去，大攞細攞拖等，大人儕、細人仔就愛春去機場也。毋過，出國旅行有兜愛注意個事情，你知無？

記得帶護照係一般個常識，應該無問題。每一個國家個電壓無共樣，有個係百一個，有個係兩百二個，愛帶電壓轉換器正方便。過海關會照電光檢查，隨身個行李淨做得帶一息仔個水、醃粿類、噴霧個東西；像手指甲剪刀、刀仔、尖尖個刺仔這兜危險個東西，定著做毋得帶。這滿盡多人搞手機仔輒輒愛充電，行動電池仔愛隨身帶等，做毋得託運。

在大型個託運行李裡背，共樣做毋得放危險個東西，像會爆炸個炮仔同瓦斯、會著火個番仔火、有毒個農藥這兜，整理行李個時節定著愛注意著。買紀念品愛帶歸來也共樣，會摜壞核個玻璃、古董、翕相機，想看啊仰仔包裝、仰仔帶過好。生肉、果子都係海關毋會通過個，在該跡食多一息就好，莫躉想愛帶歸來臺灣同朋友展覽。

出國去寮個時，佢好著過好行路個鞋，帶等兩雙，係溼核也壞核就有好代換。佢也會查詢該位個天時，正知愛帶薄個也賁個衫。有兜人有慢性病，長期愛食藥仔，就愛先問醫生坐飛行機時、在外國時愛注意麼個事情，也愛記得帶藥仔去。去外國愛先了解佢等個文化風俗，愛尊重佢等個生活習慣，特別係愛遵守各種禁忌，正毋會犯著別人。

這幾年來，因為旅行、移民、食頭路、讀書、嫁出討人，大家人在盡多國家走來走去，也造成有兜病症還來還去毋會斷。假使出國去寮歸來，圓身毋鬆爽，分先生看個時節，愛講自家去過哪國寮，對先生判斷病情、開藥仔正有幫助。係發現有發燒、頭那痛、骨節痠軟痛、目珠眶會痛，驚怕係天狗熱，就愛主動配合政府個規定，去病院仔隔開來治療，毋好哪都去行上行下，誤著自家個病情，又威脅著身邊個人個康健。

希望大家人都快快樂樂出門去寮，平平安安歸屋下。

作者：吳秀梅

☆詞彙學習☆

【揀擇】gian` tog：挑選。

【醃粿】neu` gang'：凝膠。

【價數】ga sii：價錢。

【刺仔】qiug` e'：叉子。

【幫滿】bong' man'：滿滿的。

【代換】toi von：替換。

【大攞細攞】tai kuan se kuan：拎了大包小包
物品的樣子。

【天狗熱】tien' gieu` ngiad：登革熱。

☆文法學習☆

【行上行下】hang` song' hang` ha'：走來走去。「V上V下」句型，指動作來回進行、反覆出現。例：走上走下（跑來跑去）、跳上跳下（跳來跳去）、使上使下（差遣某人到處做事）、溜上溜下（到處閒晃）、擎上擎下（拿來拿去）。